

Kluster warga emas Kuala Selangor: Tujuh positif COVID-19 setakat ini
Astro Awani
17 Jun 2020
Umavathi Ramayah,

PUTRAJAYA : Seramai 64 orang telah menjalani saringan COVID-19 susulan satu kes positif dikenal pasti melibatkan penghuni rumah jagaan warga emas di Kuala Selangor.

Ketua Pengarah Kesihatan, Datuk Dr Noor Hisham Abdullah berkata, daripada saringan itu, tujuh individu didapati positif COVID-19.

"Sehingga 17 Jun 2020 jam 12 tengah hari, seramai 64 orang telah disaring untuk COVID-19 di sebuah rumah jagaan warga emas di Kuala Selangor setelah satu kes positif COVID-19 dikenal pasti penghuni rumah jagaan ini. Saringan ini termasuk 12 kakitangan, 24 penghuni, 10 ahli keluarga, 13 petugas kesihatan dan lima orang awam.

"Daripada saringan tersebut, didapati tujuh kes positif COVID-19, 43 kes negatif COVID-19 dan 14 masih menunggu keputusan," katanya dalam sidang media di sini pada Rabu.

Langkah pencegahan seperti proses nyah kuman dan nyah cemar telah dijalankan di pusat jagaan tersebut.

Kakitangan pusat jagaan telah diberi taklimat tentang amalan pencegahan seperti penjarakan sosial yang selamat dan pemakaian alat perlindungan diri (PPE) semasa pengurusan penghuni.

Jelas Dr Noor Hisham, pusat jagaan itu bagaimanapun masih beroperasi seperti biasa dan penghuni telah diarahkan dikuarantin di lokasi berkenaan.

"KKM akan terus memantau keadaan kesihatan penghuni rumah jagaan warga emas tersebut. Mereka yang bergejala akan dimasukkan ke hospital untuk rawatan selanjutnya," tambahnya.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/kluster-warga-emas-kuala-selangor-tujuh-positif-covid-19-setakat-ini-247630>